

hinschigken und bescheiden wurde, sal Francz von Plauwin uszrichten.  
Actum post mi(sericordi)as Domini.

## 1009.

1455 nach Mai 18

### ***Heynel Goltschmied und Fricz Nailschmied verkaufen eine halbe Wiese.***

*fol. 188r* Heynel Goltsmid und Fricz Nailsmid haben bekanth, wy sy Arnold Schuster eyn halbe wiszen vorkaufft haben und gegeben vor 14 ß nuwer gr, dy andir helffte denne Petir Keyser auch czu sich vor langiste gekaufft hat. Dy selbe<sup>a)</sup> halbe wyszin Kuncz Kesseler gewest ist, der sich der junge Kessler der schulir vorczihin hat. Do haben dy obgeschr(iebenen) Heynel Goltsmid, Fricz Nailsmid und Peter Keyszir Arnolt Schuster gereth vor Kuncz Kessler und vor dy unmundigen kindir vor eyne were, ab er von den unmundigen kindern addir von Kuncz Kessler hernoehmols angelangit und beteidigit wurde, daz sy òn bey der selben halben wiszin behalden und der vor ydirmenlich entweren wollen. Actum post dominica exaudi anno etc. Lquinto.

*a) folgt durchgestrichen wy*

## 1010.

ohne Datierung

### ***Michel Syfrieds Witwe und ihr Schwager einigen sich über Michel Syfrieds Erbe.***

*fol. 188v-189r* Michil Syfridis gotseligen gelaszen witwe und Hans Syfrid, ir swagir, sint komen vor eynen siczinden rath und haben bekanth und uszgesagit, wy Michil Syfrid bey synen leben sy in keynwertikeit biderwer luthe begabit und seyn scheffte gemacht und so czu halden<sup>a)</sup> gebeten hat, als hir nach folginde geschriben stet, des ir iczlichis eyn usz gesnyten czedil hat. Item Michil Syfrid hat gegeben czu vorausz synir frauwen ũbir iren dritteil czum ersten eyn gut an agkir und wiszen, daz do leit hindir Weiszinborn und stost an den bach. Item so hat er òr gegeben malcz und bier auch czu vort, waz do bleibet und waz do czynnen geschirs ist. Item allis bethgewanth, daz do bleibet, daz sal allis ir an 3 betthe, 2 leilach und 2 kussen, dy sal sy geben synem brudir, daz sullen dy besten seyn. Item hat er ir geben wollin garn und tuch, daz es allis ir seyn sal. Und doczu, wenne sy dy wollen uff geerbit und czu tuchen gemacht, so sal sy synen brudir von den besten drey tuchen daz gelt reichen, wenne dy tuch gancz und gar bereit sint. Ydoch sullen dy tuch alle drey geferbit roth und brawn seyn.